

Os premios Follas Novas recoñecen Rosa Aneiros en narrativa, María Landesa en poesía e Paula Carballeira en teatro

A gala reivindicou o papel da comunidade do libro galego para "facер país".

Os premios Follas Novas renderon homenaxe a escritora palestina Shahd Wadi, ao fundador da librería Follas novas, Rafael Silva; e ao editor Manuel Bragado



Redacción 27/abr./25

<https://www.nosdiario.gal/articulo/cultura/follas-novas-reivindican-importancia-da-comunidade-do-libro-galego-facer-pais/20250427093626221240.html>

Os premios Follas Novas do Libro Galego entregaron os seus galardóns anuais coa tradicional gala na que se entregaron tanto os premios por categorías literarias como aqueles que recoñecen a figuras do mundo da literatura, da edición e do sector libreiro. A gala tivo lugar no Teatro Principal de Copostela e, unha vez máis serviu de repaso a toda a produción literaria do ano 2024.

A gala serviu para reivindicar o papel do mundo do libro na historia recente da Galiza, unha historia que, segundo se reivindicou, percorre estas últimas catro décadas tanto para escritores, editoras e librerías. No transcorrer da festa, presentada por **Xosé Barato**, tivo un especial protagonismo a situación de Palestina, a través da presenza de **Shahd Wadi**, do libro que resultou gañador de iniciativa editorial e tamén das intervencións de algúns dos gañadores en distintas categorías. **Manuel Bragado**, premiado de honra pola AGE (Asociación Galega de Editoras) fixo un repaso pola situación editorial da Galiza e pediu “un trato digno para o libro galego, como fixo no seu día **Agustín Fernández Paz**” tamén propuxo o mestre e editor “que todos os sectores e administracións do libro se senten na mesma mesa”.

Os premios Follas Novas están organizados pola **Asociación de Escritoras e Escritores en Lingua Galega (AELG)**, a **Asociación Galega de Editoras (AGE)** e a **Federación de Librerías da Galiza (FLG)**, co apoio da Concello de Santiago, a Deputación de A Coruña, a Xunta da Galiza e CEDRO.

Discurso institucional

No nome das tras asociacións impulsoras do premios abriu o acto o presidente dos escritores, **Cesáreo Sánchez Iglesias**, quen sinalou no seu discurso

“Facemos 48 anos a Federación de Librarías da Galiza, 45 anos vimos de facer na AELG e 42 a Asociación Galega de Editoras. Isto significa que as tres asociacións levamos máis de catro décadas construindo estruturas sociais, empresariais e culturais que poidan sustentar o noso sistema literario. Librarías por todos os lugares do noso país, verdadeiros ágoras onde os nosos libros soñan mundos. E fágoo extensivo a todos os colectivos e persoas que participan no proceso de creación e edición.



María Rozas, Goretti Sanmartín, Shahd Wadi e Cesáreo Sánchez, este sábado, na gala. (Foto: María Rozas)

Cada unha das tres asociacións organizadoras entrega na Gala dos Follas Novas os seus premios de honra anuais, nos que se salienta unha figura das letras, unha editorial ou persoa destacábel do mundo editorial e unha librería. Os galardóns que se entregarán na gala serán para Shahd Wadi, Manuel Bragado e para o fundador da librería Follas Novas, Rafael Silva.

Premios FLG: Rafael Silva

En decembro de 1971, tres cregos impulsaron a creación da librería Follas Novas en Compostela, concibida inicialmente como unha librería especializada en libro universitario. Pouco tempo despois da súa apertura, un dos fundadores, Rafael Silva, deixou a vida eclesiástica para dedicarse de cheo á xestión da librería e tamén da súa editorial. O proxecto pronto foi máis aló da súa orixe académica, converténdose nun espazo clave para a difusión da cultura galega e nunha librería que, a día de hoxe, continúa sendo de referencia en todo o país.

Premio AGE: Manuel Bragado

Manuel Bragado (Vigo, 1959) é editor, mestre e activista cultural. Foi director de Edicións Xerais de Galicia entre 1994 e 2018 e actualmente traballa como orientador en centros educativos de Redondela. Presidente da Fundación Luzes e colaborador habitual en Nós Diario e Faro de Vigo. Tamén é autor do blog Brétemas, recoñecido con varios premios, e publicou libros como *Vigo, puro milagre* e *Vigo, abella da ribeira*.

No seu discurso, Bragado acusou a Xunta de "arruinar" a edición educativa en galego e **pide derrogar o Decreto para o Plurilingüismo por ser un "fracaso"**.

Premio AELG Escritora Galega Universal: Shahd Wadi

Shahd Wadi (Exipto, 1983) é unha escritora e investigadora palestina que creceu en Xordania e reside en Coimbra, Portugal. Doutorouse en Estudos Feministas na Universidade de Coimbra coa tese *Feminismos de corpos ocupados*, centrada nas narrativas artísticas das mulleres palestinas no exilio, que deu lugar ao libro *Corpos na trouxa* (2017). Reparte o seu tempo entre a escrita, a tradución, a programación cultural e o activismo feminista e palestino. Nomeada Escritora Galega Universal pola AELG, en recoñecemento á calidade da súa obra e ao seu compromiso coa defensa dos dereitos do pobo palestino desde unha perspectiva feminista.

Obras premiadas nos follas novas 25

Premio á obra de ensaio e investigación

Abril é un país. Tereixa Constenla. Editorial Kalandraka.

Premio á obra de divulgación

Rotas (As mulleres que o franquismo agochou en Compostela). Montse Fajardo. Edicións Positivas.

Premio á obra de narrativa

A noite das cebolas. Rosa Aneiros. Edicións Xerais de Galicia.

Premio á obra infantil

Como escorrentar un lobo. Antonio Manuel Fraga. Cuarto de Inverno.

Premio á obra xuvenil

Cartas na escuridade. Lois Pérez. Cuarto de Inverno.

Premio ao libro ilustrado

Papóns. Sandra Lodi. Editorial Galaxia.

Premio ao libro de banda deseñada, gráfico e humor

Presas fáciles. Voîtres. Miguelanxo Prado. Retranca Editora.

Premio á iniciativa bibliográfica

Cantos de dor e liberdade. Voces galegas por Palestina. VV.AA. Tempo Galiza Editora.

Premio á obra traducida

Os caravanistas, de Elizabeth von Arnim. Celia Recarey. Irmás Cartoné.

Premio ao libro de poesía

Os pozos elegantes das clavículas. María Álvarez Landesa. Alvarellos Editora.

Premio ao libro de teatro

Ubasute. Paula Carballeira. Editorial Galaxia.

Premio ao libro mellor editado

O libro das abellas. Varias/os autoras/es. Apiario.

Premio promoción da lectura

Culturgal